



Australian Government

Korunaváires (COVID-19) cómmunde Misámaalumat adde Hók Ókkol

Zehón Australia ye COVID-19 wobabearam oré juwab diya jari raikké, váires gúar mutallek becábecí maalamat gúrerde mukabela loi añára mukámuikká óyi. Héntu bazu maalamat golot óitfare ar óitfare nuksani goróinna. Hían óre misámaalumat boli huáza.

Misámaalumat becí zagat ar joldi gorí sórizaire ar aám manúic ólla zañsaigoijjá hákikkot ókkol oré foriso gorá adde misámaalumat ottú basoon oré mockil banai difare.

Fotti din COVID-19 ór nuwa taza hóbor ókkol adde torki ókkol wáar sáñte, súal ókkol adde sinta ókkol tákoon gán maamuli, ar hédhilla COVID-19 adde véksin marifélar babote diyákulat foroon. Aám báfe fusár goijjá súal ókkol adde COVID-19 véksin ókkol mutallek misámaalumat or fakka, sóbut-buniyadi juwab ókkol dibollá dhokumén yaán é erada gorér.

Ekbere akhéri taza hóbor ókkol adde nosíyot ókkol ór babote, meébáni gorí góli soó www.health.gov.au or <https://covid19inlanguage.homeaffairs.gov.au/>

Covid-19 ekkán dúha

MISÁMAALUMAT COVID-19 ekkán dúha.

HÁÑSA Novel korunaváires (SARS-CoV-2) é COIVD-19 foida goijjé, zibá váires ókkol ór dhoñór oggúá fémilir híssa zibá ye insán ókkol adde háiwan ókkol óttu niyac or rastat bearame dóra ókkol iín aám thándhi loti beec hótornak ocúk or oggúá sílsila óitfare. COVID-19 manúic or dormiyan or sórizagói séf-cíñyoin or cítka ókkol adde váires baijjá dhák ókkol ór zoriya.

Duniyai agagura boút becí sáñisi elómi tahákik ókkol é deháiyé de ki becí mocúr mahér harhána ókkol é váires gúa ré alog goijjé ar tortib diyyé zibá ye COIVD-19 foida goré, yaán é sábut goijjé dé ki váires gúar wujud asé, híba influenza váires óttu forók, ar deki híba ye eén ekkán ocúk foida goijjé zían é 18 mac or bútoe cára duniyait sair milión manúic or mowt or notija ainné.

Australiat, Doherty Institute for Infection and Immunity ot Victorian Infectious Diseases Reference Laboratory (VIDRL) óiye dé SARS-CoV-2 óre alog goijjé dé foóila harhána ókkol ór bútotu ekkán. VIDRL e alog goijjá váires gúa ré oinno Australiar harhána ókkol, the World Health Organization ar oinno dec ókkol loi cíyar goijjé, taáke COVID-19 ólla foriso goróoni theés ókkol ór torki gorá, tosdik gorá adde zañsai gorá ré óifarefáan goribólla.

SARS-CoV-2 óre dóra adde fakka gorár kabeliyot adde munaséb monzuri ola bearam or elóm or umumi adde húsusi harhána ókkol ór mahér sañg oggúá ye modot goijjé de hían ot Australia báiggoitta. Dec ókkol ót dehá giyyé dé bearam farár borbaitta tezi ttú basoon adde bará ré homoon ot Australiar kamiyabi llá boli harhána ókkol iín or becí-gorí theés gorár takot or kabeliyot becí dorhari óiye. Australia adde duniyai agagurat COVID-19 ola manúic or gonti adde bearam gán loi mora ókkol ór gontir wore maalamat oré zoma gorá giyyé. Fotti dinna COVID-19 Australia-mutallek data ré tuñúi cek gorí faribá eçé www.health.gov.au

Véksin Ókkol

MISÁMAALUMAT COVID-19 véksin ókkol óre becí joldi torki gorá giyyé, híin óre cúndor gorí theés gorá noóza, ar híin maháfuz noó.

HÁÑSA COVID-19 véksin ókkol óre joldi torki gorá giyyé híin or gun, héfazot adde asór oré kurbani doon sára.

Wobabearam gán or cúru loti COVID-19 véksin ókkol toiyar goríbólla duniyair agagurar sáñisdan ókkol é kucíc gorát accíl. Hítara véksin ókkol toiyar gorá ré tez gorí faíjjé, sáñisdan ókkol, toriyar goróiya ókkol adde salani dooia ókkol ór mili ham gorá ré cúkuriya.

COVID-19 véksin ókkol ór plan or tobka ókkol óre toriki gorá adde fura gorá ré, ekkán baade ekkán gorár zagat, ekkú fúñati gorífara mowka diyyé cára duniyar be-mesál thiñya diya ye. Toiyar goijjá COVID-19 véksin ókkol beec híssa ye boút házar manúic óre híin or kiliníki tojuruba ókkol ólla cáamel goijjé.

Hían baade, COVID-19 or age ekkán wobabearam oré keén gorí mukabela gorázade hían elómi tahákik jari accíl. 2002 ot SARS adde 2012 ot MERS or dhóilla agor korunaváires ór data ré elómi tahákik ókkol é saiye, zían é tahákik goróiya ókkol óre COVID-19 véksin ókkol banar cómot cúru gorár mowka diyyé.

Australiat Therapeutic Goods Administration (TGA) ye sóktir sáñte COVID-19 véksin ókkol or gun, héfazot adde asór óre emtán goré híin or estemal or monzuri diyar age. COVID-19 véksin ókkol ór héfazot oré TGA ye nozordari gorá zari rake ar hítara COVID-19 véksin or fotti oggúá salan oré cek goré taáke híin ekhí gun man ókkol or borabor asé ne fakka goríbólla.

MISÁMAALUMAT COVID-19 véksin ókkol hótornak ar khúde COVID-19 óttu aró véksin gúar uzan dháikka asór ókkol ór zoriya beec manúic moribó.

HÁÑSA COVID-19 véksin or nuksani ókkol óttu aró nofá ókkol boút becí. COVID-19 or alamot ókkol barízaa oré rukóon adde hora acúk óttu basoon ot asór goróinna de hían Pfizer/BioNTech (Comirnaty) adde AstraZeneca (Vaxzevria) véksin ókkol or kiliníki tojuruba ókkol e sábut goijjé.

Véksin marar aám dháikka asór ókkol ót cáamel asé hórán laga, matá hoñori, gaa hoñórání adde zor. Beec hótornak dháikka asór ókkol ót cáamel asé COVID-19 véksin AstraZeneca loi bazáiya thrombosis with thrombocytopenia syndrome (TTS) hóde ekkán omil hálot adde anaphylaxis. TTS yá Vaccine Induced thrombotic thrombocytopenia (VITT), thrombosis or oinno wojá ókkol ór muktoléf ham goréde torika ola ekkán omil nuwa foriso goijjá hálot. Memelar repot ókkol ót, héçe TTS ollá baráiya hótorar sinná alamot ókkol náí.

TTS ot low zomani ókkol (thrombosis) ar low ór furza ókkol ór niso dorja ókkol (thrombocytopenia) zín jisím or alog alog híssa ókkol ót óifare.

Muthamuthi, ekkán dháikka asór hísafe TTS or emkan becí hom. Australiat TTS or hótora ré andaza gorá giyyé dé 60 bosór or lamar manúic óttu AstraZeneca 100,000 foijjal ot tokribon 2.9 ar 60 bosór adde híar woror manúic óttu 100,000 ót 1.8. AstraZeneca dusóra foijjal or baade TTS aró omil de hían dehá giyyé, United Kingdom (UK) or data ye icára gorérdde ek milíon dusóra foijjal ot 1.5 or maf.

Faaka goijja yáto emkani hísafe TGA ye góttigór báingge dé TTS mamela ókkol ót, beec híssa hóspital óttu fáareg goijjé. Véksin mara cúru óiye dé hía loti 26 Ogós 2021 fujjonto, COVID-19 véksin ókkol 17.1 milíon foijjal diya giyyé. Yaar bútoe véksin maijja manúic ór bútoe mora ókkol ór repot or becí gonti ókkol TGA ye faiyé ar saiye ar seróf háñt (7) tán mamela firazárani loi lagaiya lootfaiyéde. Mora ókkol iín beggún AstraZeneca véksin or foíla foijjal loi lagaiya – sówwan TTS mamela ókkol ar ekkán mamela firazáranir thrombocytopenia.

Manúic zaráttu low zomani ókkol ór zaati wakiya yáto fámili wakiya asé, low zomani ókkol ór hótornak woja ókkol asé, yáto low nozomar dabai loiyé hítara AstraZeneca loifaribó. Ekkán

ehéteyat hísafe, low zomanir betortib ókkol ola manúic or oggúa gura gurúp asé, zaráttu bodoilla COVID-19 véksin ekteyar goróonsá.

Zodi oggúa véksin óttu tuñúi ekkán dháikka asór tojuruba gorór, sehéti mahér óttu modot tolob goró yáto TGA ré hían repot goró (phún: 1300 134 237).

MISÁMAALUMAT COVID-19 véksin or karuai óiye dé tuñár DNA loibar ekkán forda.

HÁÑSA Véksin marar karuait mazé DNA loon or honó erada náí, ar noó accíl.

Australiar Hókumot or COVID-19 véksin karuair or moksúd óiyedé manúic ókkol óre COVID-19 véksin mariyoré SARS-CoV-2 váires loi moroon adde hora ocúk ót foroon ottú Australian ókkol ór sehét óre héfazot gorá.

Australiat estemal ollá monzur goijjá COVID-19 véksin ókkol óre gussot injekcén or zoriya maraza, hámica woror dhuñár tinkuinna kuñát. Tuñár DNA cóo, tuñár jisím óttu kessú luwa noza. COVID-19 véksin é tuñár mirasi jiín ókkol adde DNA ré bodoli nofaré.

MISÁMAALUMAT COVID-19 véksin ókkol é bāñz banai féle.

HÁÑSA Ehón Therapeutic Goods Administration (TGA) or monzur goijjá honó COVID-19 véksin ókkol é fuwain noófán goré yáto bāñza banaide hoórdde hían óre bol derde honó sáñisi sóbut náí. Oggúa véksin maháfuz ar asórola noóile TGA ye Australiat estemal or monzuri node. Oinno véksin ókkol ór dhoilla, COVID-19 véksin é añárar jisím óre thennín de antibody ókkol toiyar goríbólla taáke oi váires loi larái goríbólla zibá ye COVID-19 foida goré yáto ainda bearam oré ruké. COVID-19 véksin mara ttú bonede antibody ókkol é cóm ot honó mockil foida goijjéde honó sóbut ehón ná, zeçé baicca danir zol hóilla yó cáamel.

MISÁMAALUMAT COVID-19 véksin ókkol é tuñár DNA bodole.

HÁÑSA COVID-19 véksin ókkol é tuñár DNA ré nobodole. COVID-19 bearam ollá firazáraní foida goríte modot goréde jisími kudroti defá ókkol ór sáñte véksin ókkol é ham goré.

Ehón Australiat estemal ollá monzur goijjá tinnwá COVID-19 véksin ókkol asé – Pfizer véksin adde Moderna véksin zíín é ekkán mRNA platform estemal goré, ar AstraZeneca véksin zibá ye váires añçooní platform estemal goré.

Añçooní véksin ókkol é nuksan sára, komzur goijjá janwari váires estemal goré, híba ye oggúa korunaváires ólla háas oggúa protein ollá jenetík kudh cáamel raké, aambáfe spike protein, zehálot ot mRNA véksin ókkol é oggúa jenetík kudh estemal goré dé RNA boli hoó, taáke korunaváires or moksus spike protein or toiyari ré tez goré. Véksin oggúa yé yó tuñár DNA bodoli nofaré.

Oggúa aám COVID-19 véksin or misá biccác e golot dawa gorérdde ki mRNA véksin ókkol é tuñár DNA ré bodoli fare, zían háñsa noó. mRNA véksin ókkol é korunaváires or moksus sprike protein foida gorá ré tez goríbólla oggúa jenetík kudh estemal goréde RNA boli hoó. Zehón mRNA jisím or furza ókkol ór buóte góle, spike protein foida goríbólla boli RNA ot aséde cíkka ókkol óre furza ókkol é estemal goré. Furza ókkol é RNA ot asé de spike protein óre nizer dhák ókkol melíde, ar véksin é diyyé dé mRNA oré bāñgi féle. Defáyi furza ókkol héñtte spike protein óre osin hísafe foriso goré ar híbar khélaf ekkán defáyi juwab diya foida goré. Véksin ór RNA ye honó hálot ot tuñár DNA ré nobodole ar híba loi álagála nogoré.

MISÁMAALUMAT COVID-19 véksin ókkol é tuñáre internet, Wi-Fi, 5G yá Bluetooth loi rabeta gorái difare.

HÁÑSA COVID-19 véksin ókkol é tuñáre internet, Wi-Fi, 5G yá Bluetooth loi rabeta gorái node ar di yó nofaré ar honó kisím or tarsára rabeta kayem gorí nofaré.

Toiyar gorázardde bazu mRNA véksin ókkol ót ek fudh or estemal cáamel asé zían óre ek hydrogel boli hoó, zibá ye modot goré véksin óre tuñár furza ókkol ót ciñçibollá. Háyadi injiniar ókkol é boraborija hydrogel ókkol óre boút bosór alog alog torika loi estemal goijjé. Mesál, hítara híin óre estemal goijjé añárar jisím ókkol ór bútoe diyazoon or baade jisími furza ókkol zinda tákoon ot modot goríbólla. Hían or zoriya, bazu manúic é biccác goréde ki hydrogel ókkol óre lagede elektroní ciz gaat gólai dibollá, zían é internet loi rabeta gorí fare.

Pfizer/BioNTech véksin (Comirnaty) é ekkán híssa hísafe hydrogel ókkol estemal nogoré. Pfizer/BioNTech véksin ot mRNA or ek thukuça asé zían óre záfai raká giyyé ekkán sorbí (ténteinná) cítkat. Sorbí gán é véksin gúa ré modot goré añárar furza ókkol ot góloon ot, zehón añárar furza ókkol óre dola gorí dóri táikke dé záfani ré yó beec híssa sorbí loi bana giyyé. Véksin adde záfani gán aásánir sáñte milizagói, mRNA oré furzar bútoe gólai diyore.

MISÁMAALUMAT COVID-19 véksin ókkol ót microchip asé yáto tuwooni teknoloji foida goré.

HÁÑSA Monzur goijjá véksin ókkol ót honó cokól or software yáto microchip náí. Manúic óre tuwiabólla híin óre estemal goránoza.

Therapeutic Goods Administration (TGA) wébsáiç ot asé de Toiri Mal Maalumat é fotti oggúá véksin or fudh ókkol beggún líis óre dehá. Gun oré yekini banaibólla boli estemal or age véksin ókkol beggún or salan cek goré TGA ye ar nozordari goré honó héfazoti sinta ókkol uçí aiyér né.

MISÁMAALUMAT COVID-19 véksin ókkol é tuñáre COVID-19 de.

HÁÑSA Australiat monzur goijjá honó véksin ot zinda váires náí. Hían maáni híin é tuñáre COVID-19 dinofaré.

Zor adde hóránir dhoilla COVID-19 véksin ókkol marar hodún dháikka asór ókkol COVID-19 or alamot ókkol loi mile. Alamot ókkol iín maamuli ar hían COVID-19 foida goréde váires or khélaif héfazot jisím é foida gorér de hían or ekkán icára.

Tuñár jisím é firazárani (COVID-19 foida goréde váires or khélaif héfazot) foida goríbólla híba ye aám báfe homot 2 háfta loibo fotti oggúá véksin or baade. Hían maáni yaán emkan asé dé ki ekzon manúic óttu COVID-19 faráitfare véksin marar agorttú yáto baadorttú ar aijó ocúkkyá óitfare.

Yaán ó emkan asé ekzon manúic óre COVID-19 dóróon, zodiyó hítara furafuri véksin marifélaiye. Kintu hían cáayod ekbere becí hom.

Yaán zoruri de ki véksin gúar duní foijjal tuñúi loifélaiyo ar fakka goró deki zodi tuñáttu honó COVID-19 alamot ókkol tákile tuñúi zuda táikko ar theés goijjó.

MISÁMAALUMAT Véksin amaijja gún óre COVID-19 véksin ókkol é asór 'foñósái' fare.

HÁÑSA Véksin amaijja manúic óre COVID-19 véksin ókkol é asór 'foñósái' nofaré. Hían mumken noó. Héndhilla asór foñósani seróf oi véksin ókkol ót fare de zibá ye komzur goijjá, zinda cokól or váires estemal goré. Australiat estemal ollá monzur goijjá honó COVID-19 véksin ókkol korunaváires or zinda kisím ókkol náí.

MISÁMAALUMAT Korunaváires or bodoilla zat ókkol ór khélaif COVID-19 véksin é ham nogoré.

HÁÑSA Váires ókkol beggún bodole. COVID-19 alog kisím or noó ar yaar bútoe mediat repot ókkol aiccé váires gúar nuwa kisím ókkol ór babote. Hían maáni véksin ókkol nuwa kisím ókkol ólla asórola noódé noó.

Ehón fujjonto neeli aiccé dé SARS-CoV-2 váires or zehonó zat or zoriya hora ocúk óre rukóon ot híin becí asórola dé hían óre deháiyé Australiat adde oinno dec ókkol ót estemal ollá monzur gorá giyyé dé véksin ókkol beggún é.

TGA or monzuri adde nozordarir karuai ókkol ór híssa hísafe, hítara ei hotár wore dhákóttu saá zari raikké. Hían maáni óitfare de ki manúic óttu boldooni foijjal ókkol lagitfare zeén neki fisála ar dóoni háñc, yáto hían maáni óitfare de ki añáráttu fítin ó véksin mara foribó – zeén añará fotti bosór flu loi gorí. Tahákik goróiya ókkol é hían óre ehón ó zañsai gorér, lékin hítara zane de ki ehón or véksin ókkol é ham nogoréde héddur váires gúa noóbodole.

MISÁMAALUMAT Manúic zaráttu COVID-19 accíl ar céfa óigiyói, hítáráttu véksin mara noforibó.

HÁÑSA Zodiyó tuñáttu COVID-19 accíl, yaán nosíyot gorázar de ki tuñáttu COVID-19 véksin loonsá COVID-19 hora ocúk or tokribon 6 mac baade.

SARS-CoV-2 váires or kudoroti fará ye firazárani ré uskaide dubara faróon ór khélaf kessú héfázot doon or wore, lékin defáyi juwab or mozbuti adde héfazot thóorede thaim or lambayi ré hazebaze cára duniyat tahákik gorázar.

COVID-19 loi lagaiya hora sehéti hótora ókkol ar váires gúa ye dubara dóra adde sárme fará mumken de hákikot or zoriya, zaráttu COVID-19 óigiílgói, hítára yó COVID-19 véksin loonsá hítárar defáyi nezám óre mozbut goribólla boli.

Australiar daktori juwab

MISÁMAALUMAT Australia ye daktori hónzuk adde salani ókkol (ventiletar falong ókkol, másk ókkol, theés goróoni ókkol) óre kulafán háasel gorí nofaré.

HÁÑSA Australia ttu zaati héfázoti hónzuk besórba asé, aró beec Australiat toiyar gorázar, ar Australiat difeçázar hár thaim ot.

Communicable Diseases Network Australia and the Public Health Laboratory Network cóo, Australiar Hókumot or buddí dooia komiti ókkol e barbar boiçók goré COVID-19 theés gorár torika ókkol adde zoruriyat ókkol ór wore hédayot óre dubara forikká goribólla, COVID-19 wobabearam oré añárar umumi sehéti juwab or modot goribólla dorhari theés gorá ré anjam diyazardde hían óre yekini banaibólla, zeçé theés goróoni salani ókkol, zaati héfázoti hónzuk adde oinno daktori sálani ókkol ór lootfaani adde zari táká ré yekini banaza.

MISÁMAALUMAT COVID-19 or zoriya baráiya hájot loi Australiar hóspital ókkol athi aibár kaabel noó.

HÁÑSA Australia ttú oggúa duniyair man or sehéti nezám asé, zibá ré bálagorí raká giyyé COVID-19 wobabearam ot mazé zoruri óile battí hájot óre fura goribólla. Eçé battí hóspital falong ókkol, daktori hónzuk ókkol, salani ókkol, ar daktori soñijja ókkol ór fáaroti cáamel asé, Australiar Hókumot, estéit adde teritori hókumot ókkol adde húsusi sehéti lain ókkol ór dormiyan ot cíyardarir zoriya.

Theés gorá adde dabai gorá

MISÁMAALUMAT Hydroxychloroquine, ivermectin, doxycycline, adde zinc óiye dé maháfuz ar asórola COVID-19 elaj ókkol ar/yá céfa ókkol.

HÁÑSA Australiar Hókumot é dhákóttu nozordari gorér COVID-19 elaj gorá ókkol adde céfa gorá ókkol ór baote cára duniyair elómi tahákik óre. COVID-19 véksin ókkol mara óiye dé COVID-19 alamot ókkol barízaa ré rukóon or adde hora ocúk óttu basoon or sóbse asórola torika.

COVID-19 óre ruká adde elaj gorá Ila ivermectin, doxycycline adde zinc or (alog báfe, yáto milaiyoré) maháfuz adde asórola estemal oré modot goréde kafí sóbut ehón náí.

COVID-19 or elaj gorá Ila hydroxychloroquine, ivermectin, doxycycline yáto zinc or estemal or wosiyot nogoré Australia's National COVID-19 Clinical Evidence Taskforce.

COVID-19 or elaj ollá (zinc loi yáto sára) hydroxychloroquine or estemal oré betortib tojuruba ókkol ór baáre akhláki monzurir sáñte wosiyot goránoza. Hydroxychloroquine óttu bála zanzade hótora ókkol asé zín é kolóbi jháthka, souk ór borbadi ar low ór sinír dorja ókkol óre soktó lamaifélar notija anítfare (foran zarzar fuijonto óibar emkan asé).

MISÁMAALUMAT COVID-19 óre dóribollá PCR (polymerase chain reaction) theés ókkol bóruser laikká noó, ar híin é korunaváires óre oinno bearam ókkol óttu forók gorí nofaré zéen neki aám sórdi adde influenza.

HÁÑSA Polymerase Chain Reaction (PCR) theés ókkol óre hámicá bóruser laikká adde becí háas foriso goróoni sáman hísfé etebar goráza. PCR theés ókkol becí atáicca ar nucleic acid or sílsila ókkol óre dórifelé zín niyáci rastar nomunat mazé SARS-CoV-2 váires ólla becí háas. COVID-19 PCR theés ókkol óre bana giyyé váresi maalumát or thíkani zaga ekkán óre tuwaibólla ar tarfore dhoñór goribólla, zían SARS-CoV-2 váires ólla háas. Honó theés 100% mukommol noó, lékin Australiat estemal gorázade COVID-19 theés ókkol becí húsusi, ar oinno fuk ókkol ólla boli hían é pozítiv notija cáyod nodeháibó. Rugir bútoe bearam nodórade váires jinís ókkol baki asé de hían ólla bearamé dórar miyad or baade yó PCR theés é aijó COVID-19 ólla pozítiv notija deháibóde hían sóiyi.

United States Centers for Disease Control and Prevention ór theés gorár mocwarat tobdili ré bazu manúic é golot buzé zían é PCR theés ókkol ór mocwara díyyé, zían é niyáci rastar bearamé dóra ókkol ór muktoléf váiresi wojá ókkol ór fuk or hoek targéth ókkol óre milaiféle. Mesál, híin é ekhí thaim ot COVID-19 ar influenzar dhóilla bearam ókkol é dóra ré foriso goré ar sóiyi báfe duniyan or dormiyan ot forók goré. Zehón beec fakkárdde niyáci bearamé dóra ókkol loi duniyair uttor dhák cít hal ot góille, hían goróon gán maakul. Yaán niyomi óiza ar ekkán man or amól ói aiccé Australiat máze PCR theés ókkol aiccé dé hía loti zían hoek dhóilla targéth óre milaiféle. Australiat, PCR theés ókkol zín é influenza váires ókkol, parainfluenza váires ókkol, Human Metapneumovirus, Respiratory Syncytial váires ókkol, héndhilla aám báfe fakkárde oinno insáni korunaváires ókkol zín SARS-COV-2 or age fakkáil híin óre sóiyi gorí dóre.

MISÁMAALUMAT Fottizon óre theés gorá ye COVID-19 or fóila ré támaibó.

HÁÑSA Theés gorá ye COVID-19 or fóilani ré notáma.

Wobabearam or hákikot sinno goróon, mamelar hóbor doon ar talluk entezam goróon, ar céc fuijonto váires fará ré homoon ot foriso goróoni theés gorá ye ekkán dhoñór ham goré. Sómaj ot COVID-19 fóilani ré támaibólla COVID-19 véksin óiye dé sóbse bála torika.

COVID-19 theés gorá negétiv dehóon maáni, behárrhal, yaán noó de ki tuñúi hótora náí, yáto oinno zon ollá ekkán hótora noó. SARS-CoV-2 (COVID-19 foida goré de váires) or sámna wáar foóila tobka ókkol ót, héndhilla tuñáttu alamot ókkol torki óibar age tuñáttu COVID-19 negétiv notija dehá zaitfare. Hétolla, bála sófayir amól gorá, jisími durá táka, ar gom nolagilé gór ot táka becí zoruri. Moksód banaiya theés gorár ekkú fúñati, amól ókkol iín é COVID-19 faróon óre ar oinno faráinna bearam ókkol óre rukóon ot modot goré, zían é Australiar sehéti nezám or wore tuwoon oré hamaide.

Harhána ókkol or estemal adde theés gorár zagarr takot óre sóñolar sáñte sáñte wobabearam or kabu gorá ré héfázot gorár dormiyan ot sóiyi tooul rakibólla boli theés gorá ré húciyarir sáñte moksúd banoonsá.

Ham or zagat alamotsára manúic óre cek gorár progam ókkol cóo, theés gorár karuai hékmot ókkol óre tallukola umumi sehéti zimmadar ókkol loi mocwarar sáñte toiyar gorázouk boli hóí Australiar Hókumot é wosiyot gorá zari raikké. Alomotsárar fóilaiya theés gorár wore

Australiar Gókumot or tíyar wore beec maalamat ollá, meérbáni gorí soó [Department of Health or wébsait](#).

MISÁMAALUMAT Theés goróoni sáman ókkol fakka noó.

HÁÑSA Australiat, COVID-19 theés ókkol becí fakka. Australiat estemal gorázade theés goróoni torika ókkol beggún óre sairó dháikka zañsai gorá giyyé. TGA ye híin óre dhákóttu nozordari gorá zari raikké ar gun fakka gorár program ókkol ót laazemi híssa luwar zoriya, ziín óre háas gorí SARS-CoV-2 (COVID-19 foida goréde váires) ólla torki gorá giyyé.

Australiat, harhána-buniyadi polymerase chain reaction (PCR) theés gorá óiye dé cúnáli man or theés zibá ré tuñár jisím ot SARS-CoV-2 or hora dóra re foriso goríbólla estemal goráza. Theés goríbólla híba ye niyác or rastar nomuna luwa ré tokaza gorá goré. PRC theés ókkol becí atáicca ar nucleic acid or sílasila ókkol óre dórifelé ziín niyac or rastar nomuna ekkán ot SARS-CoV-2 váires ór sáñte háas.

Notija ókkol ór gun adde bóruser laikká óon óre fakka goríbólla ar híin or kaanuni salani diyar ré wáaibollá boli Australia lla nuwa zehonó teknoloji e TGA or húciyar emtán gorá ré tokaza goré. Australian Register of Therapeutic Goods ot cáamel asé dé COVID-19 theés ókkol or babote taza maalamat ollá, meérbáni gorí TGA'r wébsait www.tga.gov.au ot góli soó

Lóckdown adde másk ókkol

MISÁMAALUMAT Lóckdown or oggúa miyad é COVID-19 fóila ré támaiféle.

HÁÑSA Sómaj ot COVID-19 ór faránir maf oré hamaité lóckdown é modot goré. Pabondi ókkol diya ar lóckdown or oggúa miyad ar tarfore añárar 'maamuli zindegí ókkol' ot wafes óibólla héndhilla pabondi ókkol óre tulífeloon é COVID-19 or fóilani ré furussaf notáma.

COVID-19 ór fóilani ré homaité modot goríbólla sóbse asórola torika óiye dé véksin mariféloon, másk findóon, jisími duuri ré baki rakóon, hát adde niyác or rastar bála sófaiyir amól goróon, gór ot tákóon ar theés goróon zodi gom nolage.

Bearame dóijja thaim ot mazé COVID-19 ola manúic or oggúa dhoñór gonti ttú háлка alamot ókkol táke yáto bilkúl alamot sára. Baçi dui-háftar lóckdown ot alamot sára COVID-19 ola manúic é nozaníyore oinno manúic óre váires or sámna goríbar hótóra asé lóckdown tulífelár sáñte sáñte.

Talluk or asór tuwaité lóckdown ókkol é Estéit adde Teritori Hókumot óre modot goré. Sehéti mahér ókkol e Australiat fotti ek din ot nuwa mamela ókkol ór gonti ré ar hoçe sómaji faráfari órdde hían óre nozordari goré. Sóbut or wore buniyad rakí, wosíyot ókkol gorá zaibo honó nuwa rul ókkol yáto pabondi ókkol bolazori diya forér né. www.australia.gov.au ot ziyarot goríyore, beggún óttu ehón or pabondi ókkol ór taza hóbor zani rakóonsá.

MISÁMAALUMAT COVID-19 ólla másk ókkol ohazor ar/yá estemal gorá maháfuz noó.

HÁÑSA COVID-19 or fará ré safaibólla másk ókkol óiye dé osól todbir. Mukommol todbir or ek híssa hísafe másk ókkol óre estemal goráza zeçé jisími duré táka, jam ottú duré táka, bon yáto dháke-talluk or tortib ókkol, háwar bála neela-góla, hát ókkol sáf gorá, háñccani ókkol hañcáni ókkol óre algwal diya, ar beec kessú cáamel asé. Ekkán másk jisími duré tákar bodoilla noó.

Tuñár sép-cíñyoin or cítka ókkol oinno zon or hañsé foñósóon óre rukíbólla másk ókkol ekkán maamuli owsá. Cítka ókkol ór zólha ré másk ókkol e homa boli elómi tahákik ókkol é sábut goijjé, zehón híin óre nak adde gal or wore findáza. Másk ókkol óre, híin or zat saáiýore, estemal goráza arammya manúic ór héfázot ólla arnóile bearammyar bearam fará ré rukíbólla.

Yaán sábut náí de ki ekkán másk findoon maháfuz noó yáto hían é mockil ókkol ót fála zeén neki oxygen notáka yáto carbon dioxide (CO₂) óre baráiyore niyác luwa. Sehéti saásita goróiya ókkol é bouít lamba thaim loti másk ókkol findí aiyér héen honó mockil ókkol sára.

Sehéti Kérmoz ot Bearame Dórar Kabu adde Ruká Ila Australiar Hédayot ókkol ót boyan goijjá man adde fará-buniyadi ehéteyat ókkol óre sehéti kérmoz or ham goróiya ókkol beggún óttu manisoloonsá. National COVID-19 Clinical Evidence Taskforce e ek-avasi nosíyot diyyé dé ki sehéti kérmoz or ham goróiya ókkol zetará cubá yáto fakka goijja COVID-19 ola rugi ókkol óre ekéla manúic ókkol ólla banaiya rugi/gaák/tákóiyar zagar bútoore córacorí kérmoz goré hítára P2/N95 niyác félooni lootfoonsá.

COVID-19 óre Australiar Hókumot or juwab ót ahám torki ókkol ór babote zainna tákibollá wébsait ibát hámica goillo. [SBS](#) ottú yó COVID-19 or wore tuñár zuban ot maalumat or ekkán sílsila asé. Hókumoti maalumat óré torjoma goríbólla tuñúi aró mubáil phún app ókkol ádde browzar or extencén ókkol estemal gorífaribá. Tuñár hajot ókkol óre fura goréde híba talac goró. English ot battí maalumat lootfaibollá, ziyarot goró www.australia.gov.au.